

Gezaghebber Wagemaker Ta Tuma Retiro Despues Di 37 Aña cu Gobierno

Honorable Gezaghebber I. Wagemaker, jefe di autoridad civil na Aruba durante e ultimo 16 aña, lo retira e luna aki despues di 37 aña di sirbisji cu Gobierno Neerlandes den territorionan ultra-mar. Acercando e fecha ariba cual e lo tuma retiro, su deseo di mas grandi tawata pa mira e liberación di Holanda y e derumba completo di Alemania prome cu e haci entrego di su mando dia 31 di Mei.

Honorable Sr. Wagemaker i su señora lo sali di Aruba pa Curaçao durante e principio di Juni, biahando pa Merca. Despues di un estadía na Boston pa consulto i tratamiento médico nan ta spera di bishita nan yiu-mohe na Washington. Fo'i Washington nan tin idea di bai keda na un lugar ketu na cunnucu, te ora bira posibel pa nan bolbe Holanda, unda Sr. Wagemaker ta spera di por ocupa p'e cu un soorto of otro di trabao social cu por dun'e un oportunidad pa yuda e pueblo sufriente.

Sr. Wagemaker kende e aña aki ta cumpli 60, a yega Aruba dia 16 di December 1928. E tawata bien escogí pa e puesto di Gezaghebber, siendo cu petroleo tawata constitui e porvenir pa Aruba, y e tawatin hopi experiencia den relacionnan entre Gobierno i industria petrolera durante su añanan di trabao na Oost Indie, unda e a biba fo'i 1912 te 1928.

E a drenta sirbisji di Gobierno na 1904, y cu excepción di un interval dedicá na trabao particular fo'i 1916 te 1920, e a keda empleado di Gobierno te awor cu e ta tuma su retiro.

Practicamente tur e desarrollo grandi di Aruba como un centro industrial a bini despues di Sr. Wagemaker su yegada aki, y e periodo di su administración tawata difícil, siendo cu e a encera e "dolornan di crecimiento" di e industria petrolera, un periodo durante cual servicionan publico di tur soorto mester a worde extendí pa mantene cu e poblacion cu tawata aumenta rapidamente, y e añanan difícil di guerra.

Despues di 33 aña den sirbisji ultra-mar di Gobierno Neerlandes, e lo ta contento di por tuma un sosiego, aunque e ta admiti cu lo ta duro pa e laga Aruba, cu tawata cas p'e durante asina hopi aña.